

四庫全書

史部

欽定四庫全書

史部

硃批諭旨卷一百二十五之一

臣 永瑤 恭校

編修 臣 裴謙 覆勘

總校官中書 臣 朱 鈐

校對官中書 臣 陸 湘

謄錄監生 臣 范 墉

欽定四庫全書

硃批諭旨卷一百二十五之一

硃批鄂爾泰奏摺

雍正元年十一月二十六日江南江蘇布政使臣

鄂爾泰謹

奏為交盤已竣特陳額外虧缺事竊臣以卑鄙庸材

伏蒙

聖恩簡任蘇藩要地惟有竭力盡心不敢少有欺隱以

期報稱今查得江蘇藩庫錢糧除署撫臣何天培
先經報叅前藩臣李世仁虧空現在嚴審是否侵
那俟督臣另奏外臣到任後續查出李世仁虧空
雜項等銀一萬餘兩隨經臣嚴催已據陸續還庫
共接受實在錢糧十六萬二千餘兩自八月十八
日臣到任之日起扣至十月三十日止共新收過
正雜銀四十九萬一千餘兩解放過雲南四川兩
省協餉及本省兵餉驛站等銀共四十五萬五千

餘兩現存庫內銀共十九萬九千餘兩俱經督臣查弼納於十一月初十日到蘇會同署撫臣何天培臨庫盤驗訖但此外有不入檔冊實關正項者又查出前藩臣宜思恭等各任內虧缺無抵經

欽差部臣張鵬翮前任督臣赫壽撫臣張伯行

題准將康熙四十八九五十五十一等年俸工捐補銀共十五萬餘兩至今未補又查出前藩臣李世仁任內墊用虧缺并所屬各庫借墊虧缺前撫臣

吳存禮咨准戶部將康熙五十四五六等年俸工
捐抵銀共一萬六千餘兩至今未補又查出前藩
臣楊朝麟李世仁各任內墊用虧缺詳明前任督
臣赫壽常勗撫臣吳存禮批准統俟俸工捐補銀
共二萬餘兩今亦未補伏查前項虧缺銀兩既係
因公墊用准將俸工捐抵自應即將各年俸工捐
補清項乃十餘年來從前各任並不徵解歸欸且
有已徵在庫不歸原欸而復充他用者共計六萬

五千餘兩餘俱虛懸待補竊念新奉

明旨議捐俸工永行停止此誠

聖主軫恤臣民之至意縱地方公務原應地方官公辦
然公捐之項自當完公逾限過期尚且不可況任
意出入竟至虛懸將來流抵作何歸結臣受

聖恩深重身任錢糧專責斷不敢少有瞻徇以負

慈父今將交盤之外查出歷年額外虧缺將俸工捐抵
未補各項逐一詳明督撫二臣限年清補外謹遵

訓旨具摺

奏

聞臣謹

奏

此奏甚明甚晰甚為可嘉前各案虧空捐補之項當與督撫商酌應令歷任督撫司道賠補豈可累及現任無辜之員爾等若肯任怨實心任事那有不辦之理少有瞻顧因循則諸凡掣肘難行也如山西通省虧空諸務

廢弛今諾岷到任方半年料理清楚錢糧分釐皆有著
落實可謂天下撫臣中之第一者也他省督撫當愧而
法之爾等如何效力處朕自然知道不能惑朕耳目何
天培居官何如輿論不一爾可據實具奏

雍正二年正月十一日江南江蘇布政使臣鄂爾
泰謹

奏為恭繳

硃批諭旨據實回奏事竊惟江蘇重地財賦甲天下從

前各項虧空欠在民者或由災荒欠在官者半由貪鄙深維其故瞻顧實貪鄙之源因循乃瞻顧之驗瞻顧因循未有不流為貪鄙者上官需索下屬下屬因剝削小民至剝削之所入猶不足以供所出則動庫帑益愛惜功名不得並愛惜廉恥究之廉恥掃地功名隨之故虧空之州縣亦未必盡出無良實不肖之督撫司道有以使之也欽奉

諭旨將各項虧空捐補之項令歷來前任督撫司道賠

補不許累及現在無辜之員復以瞻顧因循不實
心任事為誠此誠

聖主如天之仁如日之明無遠弗届無微不燭之所至

苟非下愚敢有背

見得透即好但畏結讐怨並受親友請託王公威逼上

君父忘身名而反取悅於貪官污吏者乎除前督臣赫

司挾制種種掣肘也說不得常人所能之事口說易身

行難免之流風惡俗只以刻薄二字令人畏首畏脚捨

已從納於別案具題奉發到省前撫臣吳存禮前藩臣

公豈人人在能為者耶
李世仁現在江蘇統俟商酌督撫二臣會查確細

分別著落另摺奏

聞外至署撫臣何天培為人直率居官恂謹每對屬僚

未嘗不以酬

如果知恩自愛直率恂謹即少不諳練經歷些即知矣
恩盡職為念但不諳吏治遇事少裁斷是是非非遂未
可真心助伊做好官

能允當其家人白二向因在鎮江任原無關防與

令知

地方官吏頗多熟識及署巡撫初未免多事今已
而改之如有不樂聞而懷私之處密奏以聞
不用傳話臣謹遵

諭旨據實覆

奏外恭繳

硃批原摺合併聲明臣謹

奏

知道了

雍正二年六月初八日江南江蘇布政使臣鄂爾

泰謹

奏為恭謝

天恩并繳

硃批諭旨事署理浙江藩臣佟吉圖抵蘇口宣

聖諭鄂爾泰自到江蘇聲名甚好毫不負朕恩是天下
第一布政欽此臣質本庸人身遭

殊遇受事以來見江蘇地方外似繁華中實凋敝加以
風俗奢靡人情浮薄縱遇豐年亦難為繼私心竊
慮實非止於不要錢不廢事便足以報

君恩盡臣職也迄今待罪將及一載雖兇頑稍戢淫蕩
稍減府州縣吏亦稍知自愛然於地方本計曾無

寸補乃蒙

天語褒嘉逾於常格臣自分何人膺茲

異數自今以往惟有時凜

聖訓不瞻顧不因循竭力盡心佐署撫臣何天培謀積
貯通水利崇節儉惜廉恥務期荒年亦可不愁饑
窮民亦漸不為盜臣職無虧臣心始慰庶仰酬

高厚於萬一耳臣謹

奏

所奏甚是向聞爾料理得法故未諭及今既有此奏因將朕意諭爾凡轉移風俗之事須漸次化理不可拂民之意而強以法繩之也從前如湯斌等及幾任巡撫亦有為此舉者皆不能挽回而中止反致百姓之怨望無濟於事如蘇州等處酒船戲子匠工之類亦能養贍多人此輩有游手好閒者亦有無產無業就此覓食者倘禁之驟急恐不能別尋生理歸農者無地可種且亦不能任勞若不能養生必反為非不可究竟矣惟在爾等

地方大吏正已率屬徐徐化導使百姓明識其非樂從
務本知其利害方可長久遵行風移俗化也萬不可嚴
急使民失業究之蘇常等處還是禮義柔弱之風雖習
尚奢靡不過好為嬉戲耳況人性多巧頗嫻技藝善於
謀食較之好勇鬪狠之風相去遠矣若盡令讀書勢必
不能若槩令歸農此輩懦怯之人何能力田服勞將來
不過棄鄉棄土遠往他省仍務其舊業耳非長策也凡
事順人情就風俗而理之從容布置委曲開導方可有

成一點迂腐淺見存不得虛名務不得地方上刁頑矜
紳縱不得末業小民苦不得必須一夫不獲其所若已
推而納之溝中如此寬仁如此識見方可為民父母若
不計及久長祇顧一時高興非惟不能風移俗美翻成
勞而無功只可善為化導不可使小民失其生理也此
朕密諭爾之旨不可令一人聞之要緊要緊

雍正二年七月初五日江南江蘇布政使臣鄂爾
泰謹

奏為恭謝

天恩事竊查叅革知府張汝懷捏結署令陳紳虧空全
完詳請開復一案臣據詳轉請部臣以徇庇題叅
臣接閱邸抄不勝惶悚不勝慚愧雖嚴加處分甘
受何辭不期七月初二日接臣兄鄂臨泰家信知
奉

恩旨查弼納居官好固不待言鄂爾泰居官聲名好布
政使內第一伊等失於覺察則有之斷無徇庇之事

可以保得伊等俱著從寬免其處分餘依議欽此臣
跪誦之下感極涕零謹望

闕叩頭恭謝

聖恩訖伏念臣遠隔數千里外才處江蘇智短材庸未
能寸效乃蒙

聖明垂鑒下信臣愚非分之褒重頒

天語臣自顧何心能不思奮自今以往惟有矢此愚忱
益加詳慎務期少補涓埃不敢自甘暴棄除詳請

撫臣代疏恭謝外謹具摺奏

謝臣謹

奏

知道了不可因取信於朕而放縱改易也勉之又勉莫負朕用

雍正二年七月二十四日江南江蘇布政使臣鄂

爾泰謹

奏為欽遵

聖訓恭繳

硃批事竊臣於七月初九日恭接

硃批臣摺

諭旨廣大悉備纖細不遺如衡斯平如鑑斯澈既精義
以入神乃造化之在手此固萬物咸宜千秋惟鑒
小試之則小效大試之則大效者也臣跪誦之下
心目洞豁浮氣頓除深繹熟思歡忻累日伏念

國家設官分職凡以為民耳但能利民則寬嚴水火

皆所以為仁而勞怨非所恤如不能因民則刑名
教化皆足以為病而廉惠非所居蓋謬拘臆見薄
務虛名不以民事為事不以民心為心固未有能
奏效者恐廉吏與貪吏罪相等好事較悞事害更
大見小不成欲速不達莫之或出此矣臣仰體

鴻慈凜遵

寶訓鏤心刻骨敢一飯之偶忘宣化承流期三年而報

可臣謹

奏

所奏甚是勉為之

同日又

奏為敬陳管見事竊臣受事江蘇已經一載地方事宜粗悉大畧如丹徒丹陽河面係杭嘉湖紹蘇松常七府之運道而派夫挑淺獨累兩邑之民糧漕關係

天儲旗丁固宜優恤然馭之不善而驕悍橫索官府莫

制遂為商民累州縣分修戰船營弁勒索州縣船
不堅完官受賠墊徒為科斂口實凡此諸事業蒙
聖主洞鑒諭令查議臣更敬摠一得附陳四條伏冀

聖主採擇焉一漕船之宜更舊式也謹按糧艘舊式船

漕船

身雖廣濶長大而每船所裝額米不過六百石此

事著

外悉供運丁水手廣載私貨以致船身過重遇淺

即阻蓋受兌開行覓攬客貨包載過關停泊接受

勢濡時日迨過關上進以及達通沿途發賣客貨

又須留滯船式過大遂得藉口實非無因敢於玩
悞也況船大則行遲行遲則擁塞擁塞則河路益
隘而民船不得通甚有相去數丈守候經旬兼之
硬拏剥運捶撻交加怨聲載道誠有如此

聖主明諭者以臣愚見與其大而無適於用莫若更其
式而有便於漕并有便於民嗣後每遇一船破壞
并屆滿號大造之期請即飭令更造如舡子船式
窄小而長量其所裝可容千石六百石以裝正供

一百石以裝行月口糧餘三百石地仍許其帶貨
則船小載輕不難撐運即遇淺攔亦易扛幫而於
旗丁輩仍無苦累商販民船且得肩行無礙殊兩
便矣況船小則水手亦可減裁少一人即少生一
事兼又便於舉棹其行亦速將不踰六月便可抵
通不踰十月便可回次不惟易於督運復有益於
商民或亦救弊之一法也一巡道之仍宜專設也
竊查蘇松二府地當濱海民稠地沃賦重風刁且

有泖澱太三湖汪洋千頃最易藏姦東南壤接浙

此奏

江盜賊不時出沒所以向設分巡道一員駐劄蘇州府城巡查防範以專責成至於糧道督理蘇松

是

朕諭查弼納議奏

常鎮四府漕白二糧始須設法催徵繼則到次督趨而又押運赴淮按船盤驗是糧道一官亦難雜以他事分擾其心惟是康熙二十二年間將巡道一缺裁併糧道而巡查之責與催趨之任遂統歸一員竊思糧道之催趨正當冬月而匪類之竊發

亦係寒冬若押運赴淮勢不能不顧此而失彼以

臣愚見似應查照舊例仍設分廵道一員廵查地

方以資彈壓以專責成一水利之亟宜宣通也按

禹貢三江既入震澤底定震澤者太湖也太湖之

著實詳察而後可行亦諭伊等

水分洩於三江以入海三江者東江吳淞江婁江

也婁江即今之劉河在蘇州府城之東經崑山縣

抵太倉州境環城南而東過嘉定縣以入於海上

洩諸水下通潮汐東南半壁實賴之故其通塞所

關甚重河向寬二十餘丈後因於天妃宮建閘束其水勢潮汐來緩以致停淤暴塞所存河面僅五六丈土人方欲去之而於康熙五十四五年間又建六渡橋之新閘而河道日湮因六渡橋去海已遠潮力已微束之以閘則潮來愈微退時愈緩緩則沙停漸成淤積以致濱河田畝灌溉無資此則旱之為患也若遇大水為災河道本細復有此閘梗其咽喉以震澤西來列郡之水盡趨劉河而爭

出於丈餘之水門其洩瀉不及則汎濫漂沒之患
必不能免此又水之為患也當時與六渡橋並建
者又有七浦一閘此閘去海為近潮大則阻於閘
而不及進閘外之田受其汎濫潮小則阻於閘而
無所入閘內之田無從肩救故二閘一建而三郡
之水利欲絕士民無不欲去此二閘者而以當日
建造之始經督撫

題請未敢議廢殊不知地勢有更遷事機分利害因

革興廢在乎審時況在議建之時本為利民計也而未見為民患及今已受其患若仍不為變通拘於前議恐水利翻為水害並於前議利民之初心亦大相悖謬矣臣博訪羣議如出一口倘邀

聖明恩允廢此兩閘太倉等三州縣萬民實攸賴焉一

委署之難拘成議也伏念知府一官有統率屬邑此方新議行之事近諭大縣已改添設分理其應署之盤查倉庫之責州牧縣令有刑名錢穀城池庫獄佐貳有可署者不妨權變題請又在兩地方大吏相機之司職任匪輕遴委宜慎在從前陋習凡府州縣

而為

之也今不便又更改

缺出鑽謀署印者爭先恐後不肖大吏以此居奇視耗羨之多寡定賄賂之重輕而被委之官原期藉此獲利既所費已多且為時不久遂至百計營私而侵帑蠹民無所不至荷蒙

聖明洞燭特頒定例署印之官凡有虧空即著落原委署之上司分賠法至善也近奉部覆臺臣王恕條議知府缺出止許委府佐署理州縣缺出止許委隣近之州縣兼攝其所以杜通融瞻徇之弊者至

詳且悉臣又何敢置議獨是地方有大小之不同
政術有繁簡之各別因地制宜庶免貽悞查蘇松
常鎮所屬之二十州縣俱係財賦重地事務殷繁
江寧之上江句溧諸邑揚屬之江都暨高郵二州
淮屬之山陽宿遷等縣並皆衝劇要地素稱難治
如收漕之時印官住宿倉廩殫力徵輸尚虞遲悞
平時催徵各項錢糧條款繁多日昃不遑猶難如
限加以

欽部命盜重件並承追承緝各案均有嚴限

例干叅處任斯職者即使才具優長亦止能勉盡職
守若更委以他篆恐即有兼人之才亦乏分身之
術勢必以本地之事私委衙官則害民悞事更有
甚於同知通判者是隣近兼攝之事可行之於他
省而未便概之以江蘇也臣查佐貳首領等官未
嘗無長才若概不許委署恐敏練之員無由自效
非所以示鼓勵隣近州縣等官未必皆循吏若

例定以兼攝恐夤緣之輩反得借徑非所以示防閑
况既遵

定例凡署印之官但有虧空即著落委署之上司分
賠則委署之責自當聽任應分賠之上司若分賠
則有

嚴例委署實無專責或受分賠未免屈抑即現委署
亦難遴選深計熟思恐終無補據臣愚見嗣後州
縣缺出惟當欽遵

聖諭令該管上司不拘何官但慎擇才守兼優者詳請
委署其委署之官一有虧空或至惰悞即著落分
賠仍加嚴處在該管上司既無可推諉則為公為
私倍加詳慎而通融瞻徇之弊或亦不敢出此矣
至於知府缺出詳委府佐署理事可通行然遇府
佐中或無可委之人亦當隨時變通以收實效以
上四條均關民事臣自維職守不揣冒昧詞過冗
長伏乞

聖主睿鑒施行臣謹

奏

知道了凡奏應明白達意何冗長之有

雍正二年九月初四日江南江蘇布政使臣鄂爾

泰謹

奏為陳明地方情形仰懇

皇仁事今歲江蘇地方自夏涉秋雨暘時若將謂可卜

大有不意於七月十八十九日兩晝夜颶風驟雨

海潮泛溢江濱海濱之處同時被淹衝決海塘倒壞民居廬舍甚至溺死男婦多人臣驚聞震駭隨即轉報督臣查弼納署撫臣何天培俱已具

題外臣念

聖主以誠達天以仁育物宵旰憂勤無日不以民生休戚為念自

御極以來蠲免赦除屢下非常之

詔一旦見此濱海百姓忽遇奇災必惻然憐憫

恩賜撫賑第現今壞廬舍絕煙火秋深霜露方始而小

民暴露乏食不知所蔽若待

應如是已有旨矣

恩旨明降尚需時日萬一少壯者流離轉徙老弱者填

委溝壑是不以

如此方是

聖主之心為心而又何賴乎有司土之臣也因夙夜焦

思不得不亟求拯救之策除孤懸海外被災尤甚

之崇明一邑已奉督臣急撥存留米一萬石署撫

臣買米二千石押運至本地散賑平糶安撫兵民

臣一面詳明督撫二臣一面先動捐存銀兩量受災之大小輕重各發三百兩五百兩不等令州縣官親詣核實無力貧民按戶散給助其苦蓋新粟之資免於露處潔腹之慘以待

皇仁今續據各災屬詳報已經俵分各散訖又有各自捐資并勸大戶樂輸凡係屋廬倒塌者現在修葺爨煙不繼者得賴保全莫不各理舊業漸復安堵臣用敢據情繕

奏以稍舒

聖明南顧之憂但目前雖獲稍安恐涓滴未能補救一俟確勘情形細核分數立即詳明督撫

好
題請賑資廣沛

洪恩至於此外如蘇屬之吳江長洲松屬之婁縣青浦常屬之武進鎮屬之丹徒淮屬之山陽贛榆安東揚屬之通州如臯等縣雖據報災臣細加訪問於秋成分數不無減什之二三然猶不致大害現在

委員會勘俟勘確另

題

即間有微傷臣等自當酌議慰安可以無煩

聖慮

蓋江蘇

不但江蘇乃小人之常情

惡習但遇災祲即不被災處亦紛紛報災

業主希圖減課佃戶希圖饒租而包攬錢糧衿棍復從中聳駕以為緩徵之計若不分別查勘明白

曉諭一經

題請則錢糧輸納不前關係非細不敢不慎也更有

陳者松江府屬之海塘向係土堤自遇颶風將華

亭縣所轄金山衛柘林青村三汛一帶土堤患口
衝坍五十五處計三千六百七丈據估工料銀二
萬九百餘兩上海縣所轄川沙南匯二汛衝潰護
塘九百一十丈據估工料銀兩詳請速發帑銀修
築前來臣念東南

國課民生全賴海塘捍衛前據士民公呈請照浙江

海寧塘工開捐納事例建築石塘為一勞永逸之
計自柘林周公墩起至西金山東天妃宮止計程

石塘

可緩況目下方有旨停捐不便復行且許多有石

塘處亦未見獲利蓋海水之力非堤力可勝若勢緩可
禦土堤亦可防護如勢大湧猛即石堤亦不能捍禦也
急急修理土堤為是
充濟曾經轉請督撫正在酌議具

題而目前適逢潰壞內外無阻鹹潮直入民情驚恐

石塘之議緩不及恃若不急為搶築土堤所慮秋

應如是

潮大汐倘有害生不測不可不防第所費浩繁司
庫錢糧別無閒欸可撥臣愚伏念惟有權動正項
地丁給發堵築并即以一帶被災之民召募充役

日給工食銀五分則不特自食無虞兼可分贍家

此策口指日賑恤下頒又逢內地收獲便可接濟則一甚良法也去歲山東挑淺大得益

舉而塘工民命可以兩全臣再親履其地確查丈

尺細核工料不使冒銷用過錢糧徐議歸補實緣地方緩急之時不得不設此權宜變通之計是否

可行統俟督撫兩臣

題

請來好

題請至建築石塘原期永固然此土堤為石塘外衛

仍不可少若因有改建石塘之議而謂土堤可以

不築無論內地現在可危即將來石塘告竣而無
土堤捍禦或值狂瀾瀾漫則無以截水勢以安民
居此土堤之亟宜搶築非止為暫時補救計也是
誠所繫非輕故敢備細直陳所有

硃批臣摺三扣並

硃諭事件合併恭繳臣謹

奏

知道了

雍正三年十二月十九日雲南巡撫管雲貴總督

事臣鄂爾泰謹

奏為恭謝

聖恩報明臣體痊可事竊臣質本庸材身遭

異數五日留京六蒙

召見疊荷我

皇上天高地厚之恩

訓誨儼若嚴師

矜憐宛如慈父臣口不能述心實難安縱使竭盡駑駘
斷不能少酬萬一若復甘自暴棄稍易初心謬言
通脫移念身家在諸臣所當薄罰在臣即應顯戮
皇天后土亦必不容臣負背至此也臣於初二日已刻起
程

御賜行轎穩適快便日行兩站餘畧無勞頓兼以尚書
臣蔡璉所定二藥方經臣立即合就早晚分服今
於本月十九日已抵湖北襄陽府飲食漸增精神

漸長此後當儘力前行畧無遲悞臣以微恙致厯
聖懷午夜捫心難以自處惟有努力自愛務使體氣強
壯以重臣職以答

天恩而已臣謹

奏

覽奏朕甚為欣慰新正大禧諸凡平安如意也朕與卿
一種君臣相得之情實不比泛泛乃無量劫善緣之所
致期共勉之

雍正四年二月二十四日雲南巡撫管雲貴總督
事臣鄂爾泰謹

奏為恭謝

聖恩事竊臣於雍正四年正月二十八日抵雲南馬龍
州地方接受印信隨於二月初一日抵署到任茲
於本月十八日前齋摺家奴回滇蒙

御賜臣福字一卷荷包一箇珍食一匣臣隨郊迎至署
恭設香案望

闕叩頭領受訖及敬啟摺扣欽奉

硃批覽奏朕甚為欣慰新正大禧諸凡平安如意也朕

與卿一種君臣相得之情實不比泛泛乃無量刳善

緣之所致期共勉之欽此臣跪讀數四不能仰視既

感激涕零亦慚惶汗下自顧鈍根實何修而得此

若不勉力精進稍有墮落汝之心朕早皆洞悉矣現在不作善因未來定

朕不

輕許人也

受孽果既不敢亦不忍惟願生生世世依我

慈父

此一大事須要自了勉之

臣一大事以求多福而已臣謹

奏

同日又

奏為遵

旨覆奏事竊查雲貴兩省綿亘二三千里正雜錢糧除
鹽課及銅鉛等項外每年所入不敷所出需撥協
餉數十萬兩為計久遠實切隱憂署貴撫臣石禮
哈抄齋減則陞補摺底內奉

硃批此事議論甚妥可備悉說與鄂爾泰著再詳審定

奪奏聞等諭傳示到臣臣伏讀詳繹仰見我

皇上仁以推誠明以行恕既事理之兼該亦萬一之各
正至於恩不易示美欲兩全尤為政治要道內外
臣工各宜身體蓋市恩者末後必招怨恩難繼也
偏美者對面已成惡美無濟也據臣愚見毛文銓
所請餘糧一萬石暫不可免石禮哈不行丈量示
令自首增科實屬細心妥議臣於滇省已仿行此
法但邊方要地糧儲為先議減首重田則應俟陞

增獲有成效統計餘糧方可遞減若隨增隨減以抵原數恐陞增之地舊即隱匿之人在隱匿者原未全首雖增實未嘗增在增陞時已有漏田是減而又再減深慮熟思似於

國計無補再如內開土司首重田則一條彼雖依例輸糧其實占踞私享者不止十數倍而且毒派夷人恣肆頑梗故欲靖地方須先安苗獠欲安苗獠

此論

是極當極

須先制土司欲制土司須先令貧弱臣方思設法

鼓舞濟以威嚴俾各土司自報田畝按則陞增議

甚是甚是凡天下事利弊名異而實同途

減首重似尤屬緩圖此臣愚見如此伏惟

況欲速則不達詳審為之

聖主睿鑒

訓示遵行至於鹽課錢糧係滇省要務臣到任後即行

清查正項必不可減贏餘似可抵銷若查竈戶薪

本原無賠累鹽觔價值另有騰那即贏餘銀兩亦

未宜擅動統容臣詳悉斟酌俟有成算再具摺奏

聞外臣謹

奏

深知熟悉後再行

雍正四年三月二十日雲南巡撫管雲貴總督事

臣鄂爾泰謹

奏為敬陳東川事宜仰祈

聖裁事竊查四川東川一府原係土酋祿氏世守地方
考祿氏籍隸馬龍分據東川明季並未歸版圖至
康熙三十一年始獻土改流議歸四川管轄其地

與雲南省尋甸祿勸霑益三州接壤距雲南省城
四百餘里方隅廣濶地土肥饒昔遭流寇蹂躪之
後緣半未開闢兼之土人兇悍專事剽掠川民不
肯赴遠力耕滇民亦不敢就近播墾故自改土以
來歷今三十餘載風俗仍舊貢賦不增該府每年
徵折等銀止三百餘兩俸工兵餉不敷悉赴成都
支領往返維艱以天地自然之利致為荒蕪不治
之區良屬可惜况東川去成都二千八百餘里一

切事宜俱有鞭長不及之勢即如上年十月內烏蒙土府祿萬鍾之叔祿鼎坤統衆攻打東川村寨東川知府周彬慮川省遠不可恃具報滇省經前督臣高其倬撥兵應援始獲解散解散之後而川省所發令箭方得到府是川省之無濟於東川而東川之無益於川省也明矣况尋甸祿勸霑益三州之民時遭東川土人之害綁擄人口刦搶牲畜不一而足及至赴官告理備文關提川省官例問

土目伙頭而土目伙頭惟就中攫利曲為隱庇經
年累月竟不拏解一犯洵為滇省之累臣按稽誌
圖博訪輿論若得東川府改隸雲南聲教易及凡
滇黔兩省商民有力能開墾者廣為招徠以實其
地並將附近營汛斟酌移駐以資彈壓不但兵民
衆多土人自不敢橫肆且從前茂草皆變為膏腴
民受福利

國增錢糧似亦因地制宜及時變通之一端也再查

烏蒙土府與東川接壤驕悍兇頑素稱難治不惟
東川被其殺擄凡黔滇蜀接壤之處莫不受其荼
毒而且產富田肥負固已久若不早圖終為後患
如蒙

聖恩允東川歸滇俾臣指令將備先懷以德繼畏以威
然後徐議改流不二三年間或可一舉大定至於
防守官兵亦無庸另設查督標援勦左右二協原
備調遣並非扼要應止留一協去左右字改為援

勦協將一協裁省移駐東川府改為東川協其東
川原駐官兵是否應裁均聽部議是一轉移間地
無棄土兵無冗食節餉便民而地方賴以寧輯矣
臣受

恩深重報稱實難倘言有可採伏乞

聖主睿鑒

勅部議覆施行臣謹

奏

所奏甚合朕意東川歸滇高其倬未到之先已有旨矣其餘所論極是應題請者具題

諭雲南巡撫管理雲貴總督事務鄂爾泰四川烏蒙土司縱恣不法擅擾東川府巧家地方似此若不懲戒料理將來益無忌憚滋事愈多雲貴與烏蒙接壤朕正在諭爾會同岳鍾琪料理爾所奏之摺適至具見留心地方可與岳鍾琪和衷酌辦將烏蒙土官土目先行詳加戒諭令其毋虐土民毋擾鄰境痛改前非恪遵法度倘

敢怙惡不悛罔知斂戢應作何懲治爾當悉心籌畫將來若可改土歸流於地方大有裨益但一切機宜務出萬全慎密勿少輕易致生事端其會同岳鍾琪辦理之處朕已頒旨諭知矣特諭

同日又

奏為遵

旨議覆事竊照雲南卓異經歷章元佐條陳元江修城一摺並浙撫臣李衛議覆一摺前奉

面諭交臣詳查議覆到任後隨檄行元江府知府遲維
壘元江協副將張應宗著將三家山上建城有無
關礙水泉曾否足用士民果否情願並此外附近
地方有無瘴氣可以移建之處會同細勘稟報去
後茲據報稱查勘三家地方由府城東上山盤行
三十里居民分三層散處所應用水係自山上大
竹箐穿溝引來除日用外園蔬尚不足灌溉兼之
地勢狹隘萬難建城再踏看附郭地方惟去城北

八里許圖山之前地勢稍高炎熱稍減似可建城
但詢之紳士漢夷僉稱此地雖稍寬濶然四面俱
無地泉河道可資汲飲即便鑿井亦難有水況士
民等生長於斯不畏瘴癘且田園屋舍墳墓俱在
於斯實難遷移等語此外並無可以建城地方等
因稟覆前來臣查元江一府自宋時那氏改建至
順治十七年改土歸流歷年已久紳衿百姓習慣
煙瘴並無侵毒且田園廬墓俱近附郭安土重遷

實本人情況查府城四至東至石屏州界通臨安
府東北至臨安府曾我縣界通省城南至臨安屬
虧容土司界通外五司及交趾東南亦屬臨安土
司界西至普洱界通車里宣慰司西南至鎮沅土
司界通威遠北至臨安新平縣界西北至鎮沅土
府界所轄地界盡係各種夷人其間有兇悍猺獠
平昔與新平諸夷勾通索保劫掠害民者俱在附
近元城百里之內城守文武各官居中控制有大

江環繞無橋可渡實屬扼要重地是無論三家山
上地窄水少萬難建城即便可建亦斷不應移建
者也至於去城八里許圖山之前雖稱地勢稍高
炎熱稍減殊不思城郭之內原非郊野可比移建
則人多人多則氣盛氣盛則炎熱如舊縱有泉水
亦於土民無補李衛所議改築三家及另擇佳處
之處似無庸議但土城低矮又兼傾圮章元佐陳
請改建磚城實係元江遠計臣議於原城基址外

面砌磚裏面築土惟期堅固可以歷久所需一應
工料業交該知府會同該副將確細估計急速詳
覆俟詳覆到日臣即傳同司道細加核算併將應
動何項贏餘之處詳悉妥議具摺請

旨其普洱茶山威遠等處添設官兵所有衙署營房以
及汛房塘房並修整城垣等項臣現在駁減確估
應動何項銀兩俟數目核定再行合算至於普洱
城小難容官兵等語臣查普洱一城週圍大四里

九分駐劄官兵僅叅將一員兵五百名似亦可容
無庸開擴再貴州都勻府知府王鼎鉉條陳安順
府改站一件臣前入黔境沿路訪問官民俱稱妥
便抵貴陽時已面交各司道委勘查議尚未詳覆
合併聲明為此具摺並繳原摺二扣伏乞

皇上睿鑒施行臣謹

奏

周詳之極朕甚嘉悅

同日又

奏為據實奏

聞事竊臣到任以後清查錢局除大理一局係太和令
龍為霖管理一切正雜額息分文無虧外臨安霑
益二局爐頭匠役等雖不無些少那借然非侵項
易於著補獨省城一局為順寧府知府范溥總理
三年以來欺朦種種現在查出虧欠銀錢已有五
萬餘兩其銅鉛等項及順寧府任內銀米尚未查

清俱不在此數臣看范溥乃市井小人頗有能幹
緩則圖全急則無賴若驟行叅破反恐於錢糧無
補因密交藩司常德壽嚴諭完欸迄今一月餘自
已借抵衆人幫賠已完及二萬兩零俟完有成數
再將餘欠列欸特叅於

國帑官法度幾兩益再查滇省錢法不能流通別省
日鑄日多愈多愈賤現今每銀一兩已換錢一千
四百文合計每年約虧本欸銀一萬餘兩若不暫

行停止籌畫善策恐將來壅滯更加折耗臣擬於
題叅范溥時隨另具本請

旨暫停鼓鑄容臣徹底清算盡除陋弊將地方小錢併
沙破新錢盡數收買先合銅鉛次合工本務期錢
文堅好可以行久再謀一流通之法使必不致壅
滯然後懇請

聖恩復開鼓鑄或於兵餉民用並有實效矣合具奏
聞伏乞

睿鑒臣謹

奏

此奏可嘉之至范溥乃可惡小人聽爾處分無可惜也
暫停鼓鑄之事李衛亦曾面奏朕未允行若可減爐另
商流通之法不尤妙乎總俟爾題到交部議再定

雍正四年四月初九日雲南巡撫管雲貴總督事
臣鄂爾泰謹

奏為請肅清頑苗以靖邊方事竊查前督臣高其倬

謹陳調劑黔省事宜等事一案雍正四年二月初
一日臣受事後據貴州提臣馬會伯咨稱蓋造長
寨等處衙署營房已將宗角一處蓋造其長寨羊
城壘者貢谷隆同筍焦山一帶地方盡係仲苗性
最狡悍地更深入建造營汛兵房若非多方衛護
匠役人工難以進修請檄發大定分撥駐劄廣順
兵前往長寨駐劄臣隨經移覆撥兵去後續據署
撫臣石禮哈手札云燒燬營房抗拒建造已差官

領兵持示相機勦撫去訖臣念仲苗頑抗實因循積玩所致必先出示明切曉諭雖引兵前往應俟示後看其情形辦理妥帖再行用兵一面奏

聞若情形未定不須先煩

聖慮總之制苗之法固應恩威並用然恩非姑息威非猛烈到得用著威時必須窮究到底殺一警百使不敢再犯則威仍是恩所全實多隨具札答覆畧申此意三月三十等日又接撫提二臣手札稱據

委員撫標遊擊趙文英等稟稱職等齎帶告示花紅前往曉諭頑苗不遵化誨每日離營五里吹角吶喊自宗角至長寨五層關口俱用檔木壘石每關加五六十人把守馬棉盛甲藥弩長鎗俱已準備等語今現在酌撥官兵聽候進勦已於本月二十日將始末具摺奏

聞誠恐將來天氣炎熱抑或雨水過多兵丁率多未便務於四月內剪此醜類安輯地方其調遣各路兵

馬及檄移隣省阻遏去路等事正在速為料理等語臣念黔省諸苗仲家惡敵獨盛每小有爭鬪輒構連各寨一呼百應兇狠久著實為通省大患今既明肆頑梗殺之有名藉此一舉以懾伏羣苗誠兩得之計然先須曉諭各苗只在專誅長寨二渠魁其餘馴懦各皆安堵不惟秋毫無犯倘諸苗中有能協力擒兇者仍有厚賞其官兵經過之處無論為民為苗皆我赤子更須多方安慰毋許驚

擾若早知降服授首只須擒其渠魁一二人設仍
負固抗拒即行深搗巢穴殲除醜類事定之後尤
宜號令嚴明另立管守各還完聚毋令苗衆失所
因復詳細具札以覆二臣外茲四月初六日准提
臣移知已調平遠等標協營兵共二千七百名前
往廣順州會同定廣副將及地方官兵多撥土兵
相機撫勦臣竊思滇黔二省遠極邊末頑苗雜處
前入黔境沿途訪察苗情畧已知悉曾面與撫提

二臣切實商酌平日務當整肅營伍視無事為有事却以鎮靜為主示以無事以仰體

聖主如天好生一視同仁之至意倘仲家苗兇狠如故罔知顧忌切不可隱諱務當殺一警百使羣苗畏法二臣亦深然臣言俱有同心今臣到任兩月仲苗兇惡種種頻聞茲復敢顯肆頑梗目無官軍若復稍事姑息恐羣苗望風長其惡釁將貽後患雖官軍一至勢如腐鼠原不須多兵但此一舉不獨

為剪此醜類實欲懾伏羣苗故不得不稍張軍威
聞貴撫臣何世璠於四月初二日到任請將總兵
臣石禮哈暫免回旗同提臣馬會伯調度辦理二
臣必能了此事終應無煩

聖慮也再查土苗種類多忌少和互相仇殺者甚衆不
能報復者亦多臣已咨調定番州屬剋把郎苗兵
一百名平遠州屬熊家苗兵二百名定番十二土
司土兵六百名俾作前隊許事竣之日將所獲人

口什物甚好即行賞給仍行分別獎賞庶以苗擊苗更

省兵力伏乞

聖主睿鑒

訓示遵行臣謹

奏

前者馬會伯奏到朕恐其孟浪後見何世璠之奏朕又恐其怯懦因循正在憂疑覽汝此奏朕始寬懷量爾料理必得事情之中也事定之時應具本題奏當以軍功

賞敘石禮哈已調用廣州將軍因汝此奏復命其暫停
往粵俟料理此事畢再赴新任矣特諭爾知

同日又

奏為報明銅廠事竊查滇省銅廠額課九千六百餘
兩經管司道按年照數辦納而青龍等老廠外如
有新開之廠恐衰旺無定俱不

題報只就附近老廠作為子廠隱匿抽減弊遂百出
自清查銅觔利弊案內除額課之外凡有銅觔餘

息悉行歸公充餉其新開之廠仍作子廠照銅取
息慮至周法至善也然下屬奉行不力大吏考察
不勤隱匿抽減又所時有臣仰荷

殊恩畀以重寄錢糧所關兵民攸繫若或謬矜寬大不
親細務名譽所歸暴棄斯甚故自到任後諸凡錢
糧大小事件備細查核不敢稍懈各屬亦共諒臣
心交相奮勉茲據糧道張允隨稟稱路南州大龍
井一廠原屬龍寶子廠銅苗甚旺現今一季內已

辦獲銅六萬餘觔臣查一季獲銅六萬一年應獲
銅二十四萬合每百觔銅收餘息銀三兩核算每
年可增餘息以充兵餉不無小補俟再看一季辦
有成數即行

題報外合先奏

聞伏乞

聖鑒臣謹

奏

卿秉公忠報效處非止此一事也朕甚嘉之

雍正四年五月二十五日雲南巡撫管雲貴總督

事臣鄂爾泰謹

奏為恭謝

聖恩事雍正四年五月十四日臣家奴齋回摺扣二匣

並

御賜小種茶十二瓶到滇臣隨郊迎至署恭設香案望
闕叩頭領受訖敬啟摺匣貴陽途次二摺未蒙

批示臣不勝惶恐及敬啟臣到任後摺匣伏讀

硃批汝之心朕早皆洞悉矣朕不輕許人也欽此竊思

臣之事

主只此一心雖相隔萬里如覲

天顏臣由員外郎三年之內超擢巡撫管理總督若非
聖主洞悉臣心何以超逾常格若此但臣本凡材心長
力短方且時切冰淵惴惴自凜顧乃荷蒙

聖明以不輕許人者許臣獨何心敢不自重敢不自

勉又伏讀

朕只當爾前奏所言大事必性分真如工夫之意因有
硃批此一大事須要自了勉之欽此竊思臣子大事莫
前諭若論事親事君之事如何得了自了總不妨此不

大於事

了果能自了自能為不了之了矣勉之實大有益於有
君事親臣之身親生之

為法也的確之甚朕何所為而為此大誑也莫看得
君成之臣諸事未了何敢計及自了惟自始至終上不

高遠

負

君下不負親生生世世此身有極此心無極以為不了

之了。茲蒙

聖訓勉臣自了。臣不敢不勉自了也。又伏讀遵

旨覆奏一摺

硃批。凡天下事利弊名異而實同。途況欲速則不達。詳審為之。深知熟悉。後再行欽此。大哉。

王言誠萬世寶訓。臣知

聖主所以訓臣者。正不獨此事當銘心刻骨。一念不忘。除將黔省減則首重大要傳

諭撫臣何世璽。凜遵外謹此繕摺恭謝。

聖恩伏乞

睿鑒臣謹

奏

此奏實洽朕肺腑欣悅覽之

同日又

奏為

聖恩逾重愛身圖報事五月十四日敬啟恭請

聖安一摺荷蒙

硃批朕安將爾身子大好處為何不書奏欽此臣跪讀
之下涕淚盈襟遙望

君門惶悚無地念臣本庸愚荷蒙

高厚至於此極縱使日夜盡瘁矢以終身實難報稱萬
一乃臣之一身疾痛疴癢呼吸之間上關

聖慮經云父母惟其疾之憂言念及此無可自解若復
不善調攝漸致殘疾有誤職守是自負是負

慈父臣即不諳大義天性具在未敢不小心凜慎也竊

臣體雖羸弱精神強旺舊原無宿疾緣昨歲七月
聞爾竭力辦事總不愛養精神朕實憂而憐之果如此
則為不知朕且負朕也似爾如此大臣朕之關心尤甚
聖主垂憐著尚書臣蔡珽診視酌定藥方臣一路服食
也爾等實係朕一身也當明悉朕意加意愛養彼視為
二體者皆昏殘之主不忠之臣也要看得透
朕實如獲珍寶之喜但少疑而未全信若稍存慰朕
之意亦屬欺隱也
未敢再陳有煩

睿念茲蒙

垂問謹將臣實實欣喜歡悅身子大好处詳細奏

聞臣受

恩如山尚無撮土之效必能努力自愛以重卦疆伏乞
慈鑒無以臣病為念庶臣心稍安臣爾泰不勝感痛無
任瞻依臣謹

奏

爾只遵旨省力愛養朕方不以為念莫云萬里之隔朕

不聞知也

同日又

奏為恭報滇黔二省豆麥等項收成分數并米糧價值仰祈

睿鑒事該臣查得雲南所屬地方高低不一本年春初無雨春杪夏初始得雨澤四月中旬雨方霑足細加訪問各處豆麥收成如澂江府屬之河陽江川二縣約有七分雲南府屬之昆明嵩明二州縣約

有八分其餘各府州縣亦約有八九分不等省城
米價每京石約賣銀一兩三四錢大理等郡之米
稍貴臣等已於米貴之處將倉米減價糶賣俟秋
收買補還倉目下之價已平至貴州山深土瘠全
賴雨暘時若始獲豐收貴陽等各屬自春入夏雨
澤時沛民間佈種油菜豆麥雜糧等項約有八九
分不等現今省城米價每市斗賣銀九分計倉斗
一斗五升各屬價值雖低昂不齊而斗有大小計

算亦約畧相同再臣等親往各鄉遍行勸課目擊漢夷男婦盡力東作豆麥登場插蒔已遍早者業經秀發而各屬申文亦稱播種插蒔將完西成有望理合一併

奏報伏乞

皇上睿鑒施行臣謹

奏

上天自然憐汝也

同日又

奏為進勦頑苗收獲諸寨事竊因貴州廣順州長寨等頑苗阻修營房一案臣先奏

聞一面調集官兵土兵以張軍威一面出示曉諭再三化誨及四月二日撫臣何世璽到任復諄切示諭據副將劉業浚逐日報稱愈化愈頑臣等仰體

皇上如天好生之仁不肯輕易進勦然觀其情勢必非文告所能化誨者乃令整理軍容剋期前進五月

初六日據稱焦山長寨等寨頑苗糾黨放鎗放弩來驚營盤拾得藥箭十餘枝拏獲頑苗三名并藥箭一箭初七日諸將官議定三路進兵一由谷隆一由焦山一由馬落孔而以宗角為老營應援初八日分佈隊伍整齊號令於初九日會同進勦十六日據提臣馬會伯咨稱遊擊田玉官祿於初九日丑時將官兵分三路前進由谷隆關而入越嶺登山直抵谷隆關上占踞關口攻打焚燒立破附

近谷隆關之岩底寨冗把寨桑打寨擺架寨桐林
寨大谷隆寨小谷隆寨等處諸寨賊苗擅敢對敵
官兵奮不顧身施放大礮鎗箭齊發打死賊衆無
數理應取賊首呈驗奈賊衆頗多打死一賊旋即
搶去官兵共燒七寨占一谷隆關等因移咨到臣
十七日又據提臣咨稱遊擊卜萬年於初九日子
時自焦山起營遊擊詹天祥分兵兩路前進搶過
焦山竹林關口四圍鳴角吶喊路俱塞斷官兵冒

險攀援而上直抵苗穴翁忙險關滿山俱安藥簽
頑苗率衆擋敵擣石弩弓亂發官兵爭先頑苗敗
走深入穴內奪險關而下兵馬渡河頑苗又復拚
命拒敵官兵力戰開得翁忙頑苗復敗入井口官
兵齊追又開得井口四野頑苗蜂擁接陣礮傷頑
苗數人往取首級彼已先搶而歸遂分兵前後先
踞長寨之後山後借勢而入男女奔竄一空及齊
入長寨而頑苗復奮力拒敵是夜喊聲震地箭發

如雨令兵丁施放鎗礮嚴加固守所有頑苗拒敵
並得長寨情形移咨到臣臣自經黔省與提臣署
撫臣面會細商原委詳悉及抵滇署咨札往還常
無虛日迨撫臣何世璜到任後又復郵筒商榷其
於一切機宜屢經嚴諭副將劉業浚及諸將弁並
預事文武官員示以調度兼發有令箭專員申飭
總期謀出萬全亦擒亦縱為計長久今官兵一進
收獲各寨秋毫無犯生民安堵此皆我

皇上教養之恩浹骨淪髓有以鼓動之也但長寨而外尚有羊城壘者貢谷隆同筍焦山諸寨今據報稱止焦山長寨谷隆以及谷隆附近諸寨而羊城壘者貢同筍等寨尚未報明謹先將已獲諸寨奏

聞外隨已檄行諸將著令觀其順逆應撫應勦相機行事其已獲諸寨既稱焚燒已遍逃竄一空必須查明每寨共若干里關嶺若干田畝若干除已燒者存戶若干除已逃者存口若干逐一查明造報清

冊前督臣高其倬等所議添設武職幾員兵丁幾
何衙署營房幾所與今所獲諸寨地勢果否相符
應否更議將所獲諸寨現存房舍暫安插兵丁居
住俟事定之後應將田畝改作屯田令兵丁耕種
再有餘地悉招集漢人使逃竄頑苗無覓復入庶
可永除後患至於寨苗死傷雖多並無首級生擒
得手爾不得過與不及也朕信得爾及
何歇無幾未及渠魁若於此際稍存姑息聽其捏填名
數指軍乞降縱使殲其渠魁毀其巢穴將賊智未

窮兇心仍伏恐一寨潛據諸寨觀望數苗突起羣苗附和官兵甫退則嘯聚復來欲令生全終非長策此臣不以擒賊之少與並無首級為慮而以逃

此事

竄頑苗定應搜括急須籌一勞永逸之為要機也

末題

新提臣楊天縱到任尚須月餘馬會伯猶及了此

一切

應事其進勦兵丁被傷者十數人雖經咨稟應俟事竣之日查實陳報恐厪

聖懷先此具摺伏乞

皇上睿鑒

賜以指示臣等幸甚邊方幸甚臣謹

奏

此事何世璠亦奏聞未免書生之見況初到未審情形
大有姑息之論朕著實嚴諭訓示倘事有稍遲時日處
一切糧餉賞勞之需少掣肘遺悞朕必加罪已諭兩次
矣凡百皆令聽汝調度不可少立意見有悞機宜爾應
如何指畫一面料理一面奏聞可也

雍正四年六月二十日雲南巡撫管雲貴總督事

臣鄂爾泰謹

奏為恭謝

天恩事雍正四年六月朔日臣齎摺千總李茂蒙

恩賞給驛馬並捧

御賜臣秘製丹錠一匣到滇臣隨郊迎至署恭設香案

望

闕叩頭祇領訖敬啟摺匣伏讀恭請

聖安摺

硃批朕躬甚安爾好麼可如舊否欽此臣跪捧之下氣
不必如此爾神色俱在朕目中實不必如此
咽神愴萬里之外如聞

慈父聲臣獨何心敢不自愛其實自到任後精神氣力
覽此奏朕實如獲珍寶之喜
比舊加強前摺已備細詳陳諒蒙

聖鑒少慰

慈懷及臣接開家信知荷蒙

聖主以臣胞兄鄂臨泰女

特頒

恩諭許字怡親王弘皎阿哥臣率同臣妻席他拉氏並

臣子恕奴約奴孚奴叩頭謝

恩外竊臣先世自從開

國代沐

皇恩至先臣鄂拜雖忝列儒官歷階祭酒依然寒素凡屬

朱郎何敢躋攀今臣疊荷

聖恩不次超擢以巡撫管理總制方時深惴慄莫報涓

埃臣胞兄臨泰舊曾任中書退歸已久近叨

聖恩給以八品頂帶雖家居

輦下而禮儀疎簡朴野自甘姪女未嫺姆教鮮諳閨
箴性雖近於淑柔質難辭於固陋忽蒙

聖主顧以蓬門弱息上配宗潢聞

命之餘不勝忻躍不勝悚惶豈惟臣兄弟一門並叨
恩耀其自臣始祖下逮高曾祖父皆荷

光寵沾沐

殊麻臣自度身力斷不能報稱惟此赤心勉始勉終不敢稍懈以仰答

高深已耳謹此繕摺恭謝

天恩再臣既叨荷

應堂

聖慈怡親王處理應具啟侯安合併聲明謹

奏

怡親王實不世出之賢王卿實國家之名器真皆朕之股肱心膂朕有意聯此門親也卿當慶喜者爾前陛見

時朕已有旨言爾起身促迫未得見怡親王王查勘河
務尚須時日可圖他日會面之旨及爾動身後王回京
朕告以爾為人居心王之代朕慶喜之意動諸辭色爾
一切奏摺朕多與王看王之一種敬慕稱讚之懷實難
筆諭王實人之有技若已有之實能容之而兼愛敬之
之人王好賢嫉惡之公忠實為希有朕所悉知者當代
惟汝二人朕保再不移志者其他朕實不敢信其必爾
爾等皆朕心腹王大臣相識並非私交今既奉旨聯姻

一切書札問候來往正可彼此規諫以報朕知遇之恩
同心合德贊襄朕與蒼生造福凡形跡影像之懷一點
不必存中遵旨行莫疑

同日又

奏為欽奉

聖諭事竊照四川東川府接連雲貴逼近烏蒙驕悍橫
肆為民大害荷蒙

聖主洞燭幾先令東川歸滇俾就近料理

特頒

硃諭一道并臣摺

硃批所奏甚合朕意東川歸滇高其倬未到之先已有旨矣其餘所論極是應題請者具題欽此臣伏讀詳繹仰見我

皇上大知用中至仁兼勇生殺予奪一出無心臣當字字深思事事反體務出萬全勿少輕易終身誦之終食不忘可也臣自摺

奏後隨密差人至東川細訪確勘其地方疆界形勢
險要山川城池衙署營汛兵丁戶口糧餉賦役并
現在風俗一切礦廠俱得悉大概俟部文到日應
即遴委大員逐一查明臣更當親往細勘酌議會
題蓋事在初定每易簡畧始之不慎終成弊端不可
不熟慮至於料理烏蒙一事即當札商岳鍾琪並
密致黔省撫提二臣著先事籌畫統俟臣親勘後
妥議奏

聞大約烏蒙土官兇惡習慣可以威制似難以恩化不改土歸流終非遠計然威止可一舉恩可以先施歸滇之後臣當宣示

皇仁曉以

國法練兵屯田以壯我軍漸離其心腹徐剪其黨羽俟機有可乘設法招致庶可一勞永逸其防守官兵臣擬以援剿左協移駐已蒙

聖鑒但將備千把仍須選調其左協原設防汛擬即以

右協弁兵內分撥合先聲明再元江修城一件現
據府協詳行司確估安順府改站一件據司道勘
詳俱稱不便臣又委知府王鼎鉉本身查覆尚未
詳到合併聲明為此具摺恭繳

聖諭一道並

硃批原摺一扣臣謹

奏

是當之極卿與岳鍾琪商酌不煩朕諭也

同日又

奏為欽奉

硃批敬陳大畧事竊臣陳明錢局請暫停鼓鑄一摺荷
蒙

硃批此奏可嘉之至范溥乃可惡小人聽爾處分無可
惜也暫停鼓鑄之事李衛亦曾面奏朕未允行若可
減爐另商流通之法不尤妙乎總俟爾題到交部議
再定欽此臣查滇省開鑄以來不一年內錢壅價低

合銀一兩錢一千文之數難以搭放兵餉難以轉運外省業經管撫事督臣楊名時具

題請將錢文免其搭放並請於原役四十七爐之內減爐十一座茲減爐一本業准部咨奉

旨依議在案臣前之所以請暫停鼓鑄冒昧

題奏者實緣局內收銅之弊炒銅之弊抽銅加鉛之弊誤卯短額之弊前後牽扯之弊扣工累匠之弊種種不一恐急切難於清理故欲停鑄閉局俾令

水落石出無所逃遁以便調劑今臣受事已五月而總理錢局元展成努力清剔不避嫌怨各項弊竇業知備細可不停鑄而減爐另商流通之法誠如

聖諭但臣更有請者鼓鑄之法減爐不如減局流通之法本省不如外省蓋有一局即多一局之費爐座即減局費仍不能大減且管局賢員就近不可必得遠調又誤本任兼多掣肘本省即搭放兵餉所

銷亦無多沉錢一千文原不值銀一兩兵且受虧
據臣愚見大理一局去省甚遠除搭放兵餉外別
無可以流通之處需益一局雖在迤東發運黔楚
似屬近便然而馱脚必由省雇往返反致多費此
二局似應議減省城一局本地流通頗易而由黔
達楚漸暨江南皆可發運舊設爐二十一座今擬
加爐四座共二十五座臨安一局附近粵西由廣
南府之剥隘下船以至兩廣更為便易舊設爐六

座今擬加爐五座共十一座以上二局共爐三十
六座以符原

題部覆四十七爐之內減去十一座之數至於發運
腳價運楚每串約需銀二錢四五分運粵每串約
需銀二錢三分以四十萬串計腳價銀近一萬
兩臣詳細籌算每年採買所用三十六爐倭鉛五
十一萬八千四百觔內每百觔節省銀一兩共銀
五千一百八十四兩再查各爐役額鑄之外十日

一卯原可儼工擬於每爐每卯另發銅鉛一百觔
令其帶鑄除去折耗并歸還銅鉛物料錢本應獲
息錢二串八百六十文通計三十六爐合共獲息
錢三千七百零六串五百六十文二共銀錢八千
八百九十兩五錢六分以作發運腳價少有不敷
另當設法其二局添蓋爐房所需工費查有炭觔
節省錢文可以足辦不須報銷如此則局弊可以
清除錢法可以流通似於帑餉均有裨益臣應候

部覆奉

旨到日再會同管撫事督臣楊名時詳酌具

題如蒙

睿鑒俯允臣當一面通咨楚粵兩江并乞

聖恩頒

諭該督撫諸臣一體行銷庶無阻滯合先奏

聞臣謹

奏

金史四庫全書
卷一百二十五之一
具題來他省一體行銷之句亦入奏

同日又

奏為苗寨雖靖防禦宜周事竊以廣順州長寨建營
頑苗抗阻臣與提撫二臣再四詳酌勦撫兼行已
兩經奏

聞嗣據定廣副將劉業浚并文武各員將各寨情形逐
日飛報或肆或戢或出或潛或假投誠或仍抗拒
或白晝暗放弩箭或黑夜結黨燒掠纔順旋逆此

戢彼張種種狡獪長寨雖空然猶散據各寨不時
竊發時值天雨連綿嶺峻草深難以深入五月三
十日稍乘天霽攻開者貢一壘斬首級三顆生擒
數十人鎗礮死傷無算六月二日又攻羊城一壘
老幼降順前後所獲人口牛馬盛甲器械弩箭藥
筒等及投誠各寨戶口俱報有清冊并獲有川販
人口現在根究就目前論苗膽已喪苗燄盡衰然
而渠魁未擒羣苗觀望兇心未死終難寧帖乃據

副將劉業浚等稟稱原議於長寨等處安設營汛
今查看營基深處賊穴用此不滿二百駐防之兵
豈能禦苗反為苗制不若歸併宗角改設一大營
則各寨營汛皆可不設等情並准提臣馬會伯據
詳移商到臣臣細按情形詳查卷案長寨者各寨
之腹心也仲苗兇悍焚燒刦掠出沒無常前督臣
高其倬議於長寨就其腹心建設營汛俾前後左
右皆可巡哨凡兇苗踪跡無從潛匿盡失所恃原

不無確見宗角雖係羣苗之門戶但官軍一退彼
仍復據腹心我之所守者止一宗角而彼之所恃
以出入者原不止一宗角如此則焚燒剽掠終不
能止欲靖邊方究非長計況仲苗之所以抗拒者
原止欲於宗角建營必不許在長寨建營以期自
便其橫肆得遂其猖狂今前後調兵共及五千官
軍延時已踰三月猶未曾殲其魁散其黨而依然
宗角建營不出頑苗之計其何以能張威令以制

苗夷據臣愚見原議長寨建一大營實屬扼要但駐兵二百名原不足以彈壓應請議增宗角自應建一子營其羊城壘同筍焦山等處議俱不設汛似必不可蓋宗角內屬仲苗原不敢犯長寨四圍官軍仍不得制也但臣未嘗身歷其地固不敢執已見亦不敢徇原議前經

奏明將總兵官石禮哈暫留省城令伊前往相度形勢大小營當幾處官幾員兵幾何務期盡善以計

長久其已得諸寨宜何布置其投誠諸寨宜何安撫逐一清查商榷提臣臣再會同諸臣熟商妥議奏請


聖裁提臣亦以臣言為是今石禮哈於六月初八日起程赴長寨副將劉業浚提臣馬會伯已令赴黎平新任另委都勻營叅將劉朝貴任事新提臣楊天縱緣臨元任內寨長張義登等兇惡不法與臣密議設法拘禁現在懲治故尚未赴任此外如霑益

土州安于蕃鎮沅土府刀瀚等皆係首惡窩庇賊盜殘虐夷民為地方大害臣欲先置於法改土歸流為懲一儆百之計已密飭該地方文武官緩圖楊天縱留心民瘼深熟夷情臣當與伊合盤熟計以便次第舉行長寨一事馬會伯石禮哈自可完結楊天縱即到任轉恐一時難悉備細耳謹具奏聞伏乞

睿鑒臣謹

奏

知道了甚是甚當近者石禮哈奏到光景似大有頭緒
可慶之舉



硃批諭旨卷一百二十五之一